

# Prezidénsia Konsellu Ministrus

## VIII Governu Konstitusionál

---

### Komunikadu Imprensa

#### Sorumutuk Konsellu Ministrus nian iha loron 14 fulan-jullu

Konsellu Ministrus hala'o sorumutuk iha Palásiu Governu, iha Dili, no aprova ona, hafoin halo análize ba **aprezentasaun kona-ba pontu situasaun epidemiolójika nasionál** nian husi Sala Situasaun Sentru Integradu Jestaun Krize, Konsellu Ministrus delibera atu aprova projetu Rezolusaun Governu nian ne'ebé **mantein impozisaun serka sanitária iha munisípiu Dili ba loron 14 tan, to'o oras 23:59 loron 29 fulan-jullu tinan 2021**. Nune'e, bandu nafatin sirkulasaun ema sira iha munisípiu Dili no sirkunskrisaun administrativa sira-seluk, exetu iha kazu hirak ne'ebé ninia fundamentu forte tanba razaun sira seguransa públika, saúde públika, assisténsia umanitária, manutensaun ba sistema abastesimentu públika ka razaun seluk ne'ebé prezisa atu hala'o ba interese públiku nian. Proibisaun sirkulasaun ne'e la abranje ba ema sira ne'ebé komprova ona vasinasaun kompleta (doze rua) kontra COVID-19 nian, nune'e mós ba labarik sira iha tinan neen mai-kraik ne'ebé akompaña inan-aman sira. Delibera mós katak oras ne'e sentru sira kontrolu integradu nian, atu tama no sai husi munisípiu Dili, sei funsiona durante oras 24 loron-loron.

Aprova ona projetu Dekretu-Lei, ne'ebé apresenta husi Ministru Turizmu, Komérsiu no Indústriia, José Lucas do Carmo da Silva, ba **alterasaun dahuluk ba Dekretu-Lei nu. 10/2018, loron 9 fulan-abríl, ne'ebé aprova Estatutu husi Institutu ba Kualidade Timor-Leste, I.P. (IQTL)**. Proposta ida ne'e altera kompozisaun órgaun no rekizitu sira vinkulasaun IQTL nian, haluan número membru sira no konkretiza kompeténsia sira ne'ebé atribui ona ba kada órgaun IQTL. Ne'e hakarak mós atu armoniza kategoria membru órgaun IQTL nian ba kargu sira ne'ebé ekiparadu ho sira.

Konsellu Ministrus asiste ona apresentasaun kona-ba preparasaun **partisipasaun Timor-Leste iha Simeira kona-ba Sistema Aihan**, Simeira ne'e sei realiza hamutuk ho Assembleia Jerál Nasoins Unidas da-76, iha fulan-setembru tuirmai, no sei iha pre-simeira ida durante loron tolu, ne'ebé organiza husi Itália husi loron 26 to'o 28 fulan-jullu tinan 2021, iha sede Organizasaun Nasoins Unidas ba Alimentasaun no Agrikultura (FAO) iha Roma. Objetivu husi Simeira Sistema Aihan atu halo lansamentu, iha kontestu ne'ebé luan Ajenda 2030 Nasoins Unidas ba Dezenvolvimentu Sustentavel, asaun brani ne'ebé atu muda mundu nia maneira hodi produz no konsumu hahan, atu garante kapasidade ne'ebé tahan ba tempu naruk hodi fó hahán ba populasau mundial ho forma ida ne'ebé sustentavel.

Membru Konsellu Ministrus asiste mós apresentasaun kona-ba **Planu Asaun Nasionál ba Konsolidasaun Seguransa Alimentár no Nutrisaun**, ne'ebé pontu fokál sira Scalling Up Nutrition "Sun Movement" nian halo. Planu ne'e propoin konjuntu ida indikadór, meta no prioridade sira hodi alkansa objetivu boot halakon hamlaha, alkansa seguransa alimentár, hadia nutrisaun no promove agrikultura sustentavel, hodi garante asesu universal ba aihan ne'ebé seguru no nutritivu no mós halakon forma hotu-hotu malnutrisaun nian.

Aprova ona autorizasaun ba abertura husi **prosedimentu aprovizionamentu konkursu públiku ba akizisaun roo peska industrial rua, ho kapasidade 250 GT kada roo**, tuir projetu ne'ebé apresenta husi Ministru Agrikultura no Peskas, Pedro dos Reis.

Konsellu Ministros delibera atu aprova **estratéjia vasinasaun foun ida kontra COVID-19 ba kada munisípiu**, ne'ebé liuhusi mobilizasaun rekursu másimu ba vasinasaun iha kada munisípiu, tuir kalendáriu ne'ebé defini ona, ho inísiu iha munisípiu ne'ebé ho risku boot, to'o ba munisípiu hotu-hotu iha nasaun ne'e.

Hodi garante vasinasaun ba populasaun tomak, liuliu ba foinsae ho idade husi tinan 12 to'o 17, Konsellu Ministrus orienta ona Ministériu Saúde hodi hahú prosesu **akizisaun vasina Pfizer no garante kondisaun no ekipamentu sira ne'ebé presiza ba sira nia armazenamentu no transporte**.

Konsellu Ministrus aprova ona **tetu agregadu no dezagregadu ba Orsamentu Jerál Estadu (OJE) tinan 2022**, ne'ebé apresenta husi Vise-Ministra Finansas, Sara Lobo Brites. Konsellu Ministrus aprova mós konjuntu inisiativa adisionál ne'ebé fixa tetu agregadu ho montante millaun 1.571,6. Governu define ona prioridade nasional neen ba OJE tinan 2022: 1) dezentvolvimentu kapital umanu (edukasaun, formasaun profesionál no saúde); 2) abitasaun no inkluzsaun sosiál; 3) setór produtivu sira (agrikultura no turizmu), ambiente no konektividade; 4) dezentvolvimentu setór privadu; 5) dezentvolvimentu rural; no 6) boa governasaun.

Vise-Ministra Finansas halo mós apresentasaun ida ba Konsellu Ministru kona-ba **sorumutuk ho parseiru dezentvolvimentu sira tinan 2021** (*Timor-Leste & Development Partners Meeting, TLDPM*) ne'ebé sei hala'o iha Auditóriu Kay Rala Xanana Gusmão, iha loraon 30 fulan-jullu tuirmai. TLDPM hahú uluk ho sorumutuk bilaterál iha loraon 27 fulan-jullu, liuhusi sorumutuk ida kona-ba integrasaun ekonómika rejional iha loraon 28 fulan-jullu no fórum ida Organizasaun Mundiál Komérsiu iha loraon 29 fulan-jullu. Sorumutuk ida ne'e ho parseiru dezentvolvimentu sira organiza tinan-tinan husi Governu hodi fahe nia vizaun ba oin analiza prioridade ba médiu prazu no hodi haree ba progresu ne'ebé alkansa tiha ona iha dezentvolvimentu nasional.

Ikusliu, Konsellu Ministru aprova **nota pezar ida ba Camel Budiardjo ninia mate**, ativista direitus umanus no defensora ba timoroan sira-nia ukun-rasik-an. Iha nota pezar ne'e Governu hateten katak Camel Budiardjo "Timor-Leste sei la haluha no sei hanoin nafatin ho domin boot, admirasaun no respeito ba ninia kompromisu ho direitus umanus, justisa no solidariedade". **REMATA**

url: <http://timor-leste.gov.tl?lang=tp&p=28824>